

Ord la perspectiva dil tschéss

Exposiziun da fotografias dallas muntognas da Carlos Rieder a Mustér

HANS HUONDER/FMR

■ Il Lucernes Carlos Rieder unescha tuttas premissas per bunas fotografias ord l'aria. El ei pilot, dispona d'ina camera adattada persuerter e ha igl egl pil detagl. Sias lavurs ein da veser naven da questa sonda ella Galleria d'art RdC da Rico de Castelberg a Mustér.

Da haheias enneu fascinescha la muntogna cun sia pézza il carstgaun. Ellas vegnan buca mo ascendidas mobein era malegiadas e fotografadas, descretas e commentadas. Lur cumparsa fa impressiun a bia glieud e sveglia sentiments. «Cuolms inspireschan buca mo perquei ch'els ein plein dignitad, els sveglian era ina gronda forza simbolica el carstgaun. Cuolms fuorman numnadamein in'axa denter tschiel e tiara, simbolisond aschia la colligiaziun dil terrestar cul celest. Il cuolm stat per las sfidas dalla veta. Tgi che fa patratgs davart la veta ascenda internamein in cuolm e fa aschia probabla-mein era interessantas scopertas», di l'artista *Marianne Mittelholzer*. Ella havess en sesez teniu il plaid per la vernissascha dall'exposiziun da *Carlos Rieder* sonda proxima. Pervia dalla pandemia dil coronavirus ha quella buca liug. Tonaton san ins prender investa dall'exposiziun. Interessent(a)s pon s'annunziar per telefon 081 947 51 43. L'exposiziun cuoza entochen ils 23 da schaner 2021.

Bia savida e capientscha

Dapi sia giuventetgna sefatschenta Carlos Rieder dalla fotografia. El ha experimentau ed aschia recaltgau bia savida sin quei sectur. Parallelmein ei sia fascinaziun per las muntognas naschida. Sco pilot ha el allura saviu entscheiver a guder quellas ord l'aria. Quellas caschuns ein vegnidas cumbinadas culla fotografia. «Schegie che ses malergs ein plein energia, derasas els era bia ruasseivladad», di *Marianne Mittelholzer*. Las fotografias da Carlos Rieder ein plein harmonia mo dattan tonaton in'impressiun dalla dinamica alpina. L'intensitad dallas colurs dat

ina tempra tut special a sias fotografias. Parts exponidas el sulegl sebrattan cun preits e plauncas ell'umbriva, preits crap bunamein neras e surfatschas cun neiv procuran pil cuncontrast. Da veser ell'expo-

siziun ein era fotografias da cuolms dil contuorn da Mustér. Il visitader vesa leu denton era fotografias d'enconuschents cuolms sco il Matterhorn, Eiger e Mönch. «La dinamica dallas fotografias

catapultescha ins bunamein ord la gallaria e directamein el liug nua ch'ellas ein vegnidas fatgas», puntuescha *Marianne Mittelholzer*. Il recav ord la vendita dallas fotografias va dil reminent cumplei-

namein en favur dalla Christa Fondati-on. Quella ei vegnida fundada 2007 e sustegn projects ell'Africa che han la finamira da migliorar las cundiziuns da viver e scolaziun d'orfans.



Ina dallas fotografias exponidas. Ella muossa il contuorn dil Péz Scopi.